

No-Billag: Ina sperdita per la Svizra

La fin pils emetturs regionalis

DA LUCAS DEPLAZES / ANR

■ **In comite «Na alla fin dallas emissiuns» fa attents sillas consequenzas d'in gie a l'iniziativa dil pievel che pre-tenda in scamond total alla SRG SSR d'incassar taxas per sias emissiuns da radio e da televisiun. Quei muntass ina sperdita per la Svizra.** In comite independent – che vul esser ina vusch dalla cuminonza civila – ha presentau a Berna sia campagna e ses placats encunter l'iniziativa No-Billag che vegn en votaziun dil pievel ils 4 da mars 2018. Il sujet muossa la forza destructiva da quella iniziativa radicala, cul motto: «dameins di-

versidad – dameins Svizra». Mellis sponsurs pigns han procurau per ina summa da sustegn da 920 000 francs.

Il spért da cuminonza maunca

Il sribent *Pedro Lenz* deplorascha la munconza dil spért da cuminonza che lubeschi da producir mo quei che renda. L'iniziativa No-Billag mondi buc a prau cun nosa cultura e nies patertgar, han divers exponents manegiau. *Diego Yanez*, il directur dalla scola da schurnalissem MAZ, ha sincerau ch'ei existi negin plan B. Actualmein finanziescha la SRG SSR ver 70% dils cuosts cun las taxas incassadas da Billag e ver 30% (300 milliuns

francs) cun entradas ord la reclama. La damonda d'in abbonament da «TV-Tage-schau», savens en discussiun, seigi ina illusiun. Quei hagian emprovas digl'exteriur mussau. Ils iniziants vulan sur-schar las emissiuns alla fiera libra. En ina naziun aschi pintga sco la Svizra funcziuna quei buc, han divers exponents admi-niu. Yanez conceda che la SRG SSR con-tonschì buc ils giuvenils. Quei seigi den-ton negin motiv da stizzar tut.

La gronda muntada dils emetturs regionalis

André Moesch, il president da TeleSuisse, fa attents silla gronda muntada dils 34

emetturs regionalis da radio e da televisiun. El senn dil survetsch public infor-meschan quellas staziuns lur regiuns sur dallas activitads politicas, culturalas e sportivas. Senza las contribuziuns dalla SRG SSR – che muntan a 30–60% da lur budgets – pudessan quellas instituziuns buca subsister. Mo TeleZürich possi ex-ster senza subvenziuns, ha Moesch con-statau. Produenziuns da televisiun seigien fetg caras. Ils cuosts fixs per ina emissiun d'informaziun seigien tuttina aults, che tala sedrezzi allas 5,5 milliuns persunas ella Svizra tudestga ni als 82 milliuns sco en Tiaratudestga. L'iniziativa No-Billag seigi destructiva, pericliteschi la divers-i-tad dallas medias e seigi perquei da refu-sar, recamonda il comite.

Ina discussiun fundamentala

Tenor las empremas retschercas gauda l'iniziativa No-Billag, che vul scumandar alla SRG SSR d'incassar taxas per finan-ziar ses programs, da guder dabia simpa-tia. Diversas enquistas prognostiche-schan in clar gie. Quei che fa surstar ein las considerablas vuschs in favur dall'iniziativa ella Svizra franzosa e taliana, re-giuns che profiteschan il pli ferm dalla si-tuaziun actuala. Remarcabel ei plinavon ch'ìls meinis suondan buc il schema usi-tau: giuven-vegl, dretg-saniester u Svizra latina-Svizra tudestga (Röstigraben), mobein provocheschan discussiuns con-traversas tras tut ils secturs socials. Da be-neventar ei il fatg che la debatta davart l'iniziativa procura per ina discussiun fundamentala sin nivel naziunal sur dal-las valurs che tegnan ensemen la Svizra sco: independenza, diversidad, informa-zion objectiva per tuts, tgei vala il service public, il sustegn dallas minoritads lin-guisticas/culturalas. Denton, duei la de-mocrazia funcziunar en in stadi pluriling sco la Svizra, drova quella ina infrastruc-tura d'informaziun naziunala, professiu-nala ed independenta.



Il comite «Na alla fin d'emissiuns» ha lantschau il cumbat da votaziuns encunter l'iniziativa No-Billag a Berna. Emilia Pasquier, gestiu-naria Think Thank foraus, Andre Moesch, president TeleSuisse, gestiu-nari Radio FM1 e TVO, Pedro Lenz, sribent e Diego Yanez, direc-tur dalla scola da schurnalisists MAZ (da seniester).

KEYSTONE